

Paulsh Thessalonica kuhtée akchiwakíialaxuahcheesh ala kuss baawaalaátdeehcheesh hinné koók basséesh.

“Shóotaachi?” hek hawátam Paul huuk huuash.

1 Awaasúalahum Thessalonica huuash kuhtée koon akchiwakíialaxuahcheesh báakukkule Baksáau Akbaatatdía dak Baxxiilaatúuash Jesus Christ kon aáush hinné díiluan díiluss díawuuk. Akbaatatdía dii íkaalakak an dii baa áatchiluuash al ítche áalahkukaatduuash hilísh baak ii baakaanmalákuuk.

Silvanus huua dak Timothy huua dak awáxpe koók. Hawátam Paul huua bíik.

Thessalonians an bilaxpáakuua dak an baa kaláttuua

²⁻³Baksáau Akbaatatdía ishóoche baluuák bahchiwakíikaatbuut dii bahchichéwahcheiluk. Hinna an baa dáhkalattuuua kal ii daxátaak Jesus Christ al aláchissuuash kal ii ammaa díalalakuuash baatcháatak Baxxiilaatúua an bíálaak datchítdessaa alóoluuash baatcháachik. Haak ii koochéesh bahchiwakáautatchee kukkan dii bahkalaaxtássaailuk. Díiluan dii balee

héeleluuash ii Akbaatatdía kusseé “Ahóoh.” baailuk.

⁴Bakúpkaatuu Akbaatatdía ílaataahilia dii íchissalakak dii dúttuuméwahkuuk. ⁵Kooták. Al ílíia dak an baatcháacheesh dak Baleiláaxbaaxpee dak ii Baleiichiweeítcheesh aawúuawalakuuk. Haak ala koottáhile bahkalátchekaasuum alákuuk. Haak dii balee héeleluuash an balee bilaxpáake alákuuk. Ii dii bahkuxshiwiáwuum ii dii íttuaa koók.

⁶Heem ko baapéesh balee písshe daláak balee baa hílatduuk. Baxxiilaatúuash Jesus ala kootéesh an bilaxpáake an díash díiluh díalaloom baa ala chúuss dalaúush ahúk. Shóon Baleiichiweeítchee dáhkallattuuak bilaxpáakeesh dii baailíshehkuuhtaa Baleiláaxbaaxpee dii baaihkammáachihchek. ⁷Heem an dii bilaxpaakuuash kal ii dii xíassuuk. Iak awúum Macedonia huuash dak Achaia huuash koon akchiwakíia an dii an bilaxpáakuuash kan dii íkuuk. An díailush daacheesh kala ko díáluuk.

⁸Iwak ii éwahkuuash Macedonia dak Achaia dak kuhtée Baxxiilaatúuash is baaaliichiweé aláxalaa déelahkuuash koók. Haak Akbaatatdía an dáhkallattuuash shóoleet éhkuuk. Kukkala shóonmaau kan biikukkúuk. Baa dáhkallatchekaasak dii íwahkootuum heem Macedonia dak Achaia dak bilaxpáake kusseé kal ammaa ala sheewáalituuleetak.

⁹Dii bíom díaxpaaliio dís akbaatatdíalahkaak duuash dilúsaak Akbaatatdía hawátkaatam kuk ii shéeleetak kan baa kuttáchkaateesh kalako dáhkallattaak kalako kuss dáhchiwakuuk. Macedonia dak Achaia dak kuhtée hilaakée hileen bilaxpáakeesh it ii iláaattuuk. ¹⁰Haak baapím balee ishóocheelam Akbaatatdía dáakbachee Baaiiwaakoochihtéesh koon ala chishíwiash alóolikaatdaak duuash kúh balee chiwaáuk. Hinna dáakbacheesh bale shée koon aachissáak chiléhkaak heesh kal ak balee iléesh kuttáchkaatak. Hinné dáakbacheesh Jesus koók. Kúh Akbaatatdía an daaskawáak ak baa kxawíihile al iitchúuhileesh Jesus kon balee híiassaa al awímmiluuash ak díawilikkuuash koók.

Thessalonica kuhtaa Paulsh ammaa hilé

2 Bakúpkaatuu kan díilaa élahkuuk díiluh dii biiák buum baa al an díawuuash baa hámneetasse. ²Kal élahkuuash koók. Éehk Thessalonica it kuss beéssuaa

awaasúualahoosh Philippi huuash balee koolám an balee dútchikxawiilittuuk. heehaa bas Akbaatatdíoo balee daásbaatchaacheesh ii balee díahchem ak balee iichúuleesh balee baa hiléessaawialom kootáa Akbaatatdía is baaaliichiweé an bíluss húuhcheesh baachiwaawalákuuash koók. ³Hinna baa dii baachiwaawalákuuash ii dalásuaa bulusshíhchiwiawuuash ammaa al iháatbuuleetak an basakkupéelituuleetak baakúkkuwaleetak balee íwahkootassaak. ⁴Itchihk Akbaatatdía an balee baa sheéhcheesh kalako sheewúuk. Balee chilasshihták “Hilósh hileén kal ak día koók.” hiliachim Baleiichiweéitcheesh bilikkukák balee baa chiweéhchewiak. Bilaxpáake an balee baa sheéhchewiak an balee baaláhchewialituuash ko díawaassuuk. Heeht Akbaatatdía ak balee íkaalaatak kan balee daasawuúko ammaa baasshihtúuash ak éhcheesh koóm an balee baa díahcheesh kalako díawuuk. ⁵⁻⁶Ehkoon kalakoon dishóotuuan ak baatcháatbuuleetak. Díilusseesh koótbuuleetak. Ihéesh kúh koótbuuleetak. Deéla dii bííom hawáttaakaatdak an díiluss baláaush bale ilíia ítchikaate díiluss sheewáak dii kúalitbaak dii buluttaatbiáwuuleetak. Dís bálaaush xálitbaak bulutchiwiáwuuleetak. Ammaa aawaaxuáleetak. Akbaatatdía ak balee íkaalaacheesh koóm éhchek. ⁷Christ Jesus is bacheeiiaxpíluupeesh ko balee hawáhchem díiluss balíitaahinmiawaak ammaa an díalaaliilush daacheesh dii baachiweewiáwuulak kooták. Heehaa koótbassuuk. Itchihk koottaléesh dii awáxpak balee ala kooléesh dii awáchissak dii balásdeek. Bía dáakichissak dáakbaailisaak eéitchiikuuluash ko dii koótbuuk. ⁸An dii awáchissuuash kal íwahkootak Akbaatatdía is baa al iichiweéitchikaateesh dii éhchewahchewiawaak kuttách díawaassuuk. Ii kootéesh dii baawilísaak kan baa ala sáapeesh díawaawalakak kootáa baashbalákbiawuuk. Balee daasíkuxxeen dii bulusáauk.

⁹Dáhchichelahkuuwis bakúpeen an ba a díawaakaasak an bihchi baailísshewuuk. Baapí dak ootchia dak an balee alatawée ala húuash baa díawaak an dii baashittaátbuuleetak. Akbaatatdía is baa al iichiweéitcheesh kalako dii baachiwaawalákkaasuuk. ¹⁰Ak balee éhcheesh díiluk. Kal an balee an bilaxpáakeesh élahkuuk. Deéla

Akbaatatdía balee íkaalaachim ak baa kalátcheesh dii balee héeleelam ammaa xatáaush díilussee ítchikaatbuuk. Ammaa an díawuuash baa annámmaak dii díawaaitchiwaawalakuuk. An balee batshúaleetam élahkuuash koók. ¹¹Eehkoon bachéem dáake ii íkuxxache an díakuuash koók an dii koótbuuash. ¹²Dii baánmalaak dii píishko bapchílaak koómmaassuuk. Al ítcheesh ko dii aaweéwiawaak. An dii an bilaxpáakuuash íttaak Akbaatatdía isítchiiiaak íwahkooteesh dii aawiíwiawuuk. Koon dii iláauk. “Duúaalah.” hek. Duúak díiluan baaátdekissaalalah. Díiluh hawa iiláaalalah. An bacheeítcheesh an baa hawasséesh ala sáashiiash díiluh ham dii éhkuuk.

¹³Hinna íwahkooteesh Akbaatatdía ii kusseé “Ahóoh.” buua ii baa koochihták. Kooták. Akbaatatdía al iliíash díiluss aawuúom an baláau kussaam élahkuuk. “Bíiluan baláawaakaaauk.” dílíchissuuk. Akbaatatdía áapcheesh ko díikukkak kootkaáshim élahkaak dáhkalattuum attack kalako iláaulassheen kalako ii an dii an bilaxpáakuuash kulussáak íwahkooteesh kúkkala koók. Akbaatatdía al iliíash koóm baakoon baa hilaaták dahkúk. ¹⁴Haak kalakoon bakúpkaatuu Jesus an bilaxpáake ala kootéesh an díash koótdalom an dii baailíshehkuuash iiák Judea kuhtée Akbaatatdía is bilaxpáakeesh kúh an baailíshehkuuash díiluh kan dii kala koottáhiliiook. Ko íak akchiwakíash ii is bilaxpáaktaahiluua Jews kooté an baailíshehkuuash díiluh éehk hilaakée díin dís bilaxpáaktaahiluum dii baailíshehkuuk. ¹⁵Ko iak bilaxpáakeesh Akbaatatdía ammaaihchiláakuuhcheesh ak dappéesh Jesus ak dappéesh kúh it koók. Haak deéla bíiluh balee baailíshehkuuk. Akbaatatdía al íkee hileen bilaxpáakeesh kan daásshootdak isítchissaaihmaachik. Kúkkan baa is bilaxpáakiiiolettaahiluuk. ¹⁶Deéla balee óochiahchewiiook bah. Iak Jews kootássee Baleiichiweeítcheesh baachiwaawakbíawoom balee hiléessaawiook. Hileen baa ihéesh Baleiichiweeítcheesh kal ii ihkulustúuash iikukkóossaak iléessaawiook. Iwahkootuuash kal ammaa ala kxawíihiluush ilúuahkuuash háakseesh ihchi baa aaliíok. Akbaatatdía kala kóoxik.

Paulsh kaka ashbiléenneewiak.

17Deéla bakúpkaatuu bíiluk bínmaxuash dii awíhchiss baáush kukkan bíilaa beéwiawaassuughtaa dii balee híiassaahaatdom balasúua al isée it éehkoolak kaka dii awákaawiissuuk. It shíassaa kaka díiluss bahchishshíwiawaak it bahchilasshihtáawahkuk. 18It díiluss bahchishshíwiawuuk. Biiwaxúa sámmitaahinnak bahchilasshihchíhtaa Chíisbishe bale baa hiléessaak. 19-20Kal ii balee bilaxpáakeesh díiluk. Kal an baa kuss awákaalittuuash kal ii balee daásitcheesh díiluk. Ihéesh ak dii dasshipúuleetak. Dii ii balíwasitchiwuuk. Kal ammaa an díawuuash kal an díawaaitchiwuua kal ii baa xíassee díiluk. Shóon Jesus huulák ishóoche bíolak díiluk kal ii baawihkammáatuuash.

3 1-2Dii awákaassuum shóotdak balee alaaxták basshihtawakák balee baailíshem bas daásbakhulupupshiilitak áawahkuuan háaksee hilíatbaawiwuuk. Haak kalakoon hinna bakúpuua Timothy hua ko díiluss déewahkuuk. Biiluk balee ittátak hinna awaasúualahoosh Athens huuash koon bakaawíawuuk. Akbaatatdía ii baa baánmalaau hinna Timothysh awáxp baalíwawaakaasak Christ is baa al iichiweéftcheesh bilaxpáake chiwaalahkúk. Heem díiluss déewahkaak dii kuxsalákak an baa dáhkalattuuu kal ii chichúcheesh díalakbahchewiawaak. 3“Aaláa kalatchíí éehk dii héeluuu hám daaskawáak baatách akúss shiitaáhak heoh.” baliaták íwahkootbuuk. Eehk bilaxpáake kan dii ishditcheeshíiak dii baailíshehkuua baatchaatéek. Kala élahkuuash koók. Iwahkootteesh kukkan bii chilíihchessuuk. Akbaatatdía kal an daasannía kala héeleeluuk. Heem baa an baalúuash chúuss baáuk. 4It dii balee heeleeléem kukaa kan dii baachiwaáuk. Kukkala hilíatak baa an baalúua chúuss beéwohmaah. Heem éehkoom kala kooták. 5Kala ala sheewéesh koók. Shóotaalaahkaatuulak baalaaxták al ítchiwaalitdeetam attak Timothysh ii díiluss déewahkuua koók. Dáak shóotaalaahkaatuulak an baa dáhkalattuuash shóotdak. “Aaláa Chíisbishe dii ishditcheeshéelittuuu aa ammaa ala hámneete dii aalíowissaaoh.” baliatak éehkuhtee ammaa an díawuuash baa haawéewissaaak balíia akkumméelittuuk.

⁶Hinna Timothysh kala kuuák bale iichiweéftchim óok. Balee ittéek. “An dii ala xakkéelituuleetak baa dáhkalatchekaasak bach aláchissak dii íwahkootak balee dáhchichelahkaawaleelakak díluuan balee alákaalissak dii íwahkootuuk.” hek. ⁷Heem biilápaachkaatu baalee ittéem baatcháachik. Bínmaxuosh an baawilíshelituulak baa baalúuak íwahkootesh an baa alákuua ítchim kan biisásshiahuuk. ⁸Heem hilaakée kan balía bahchisséelitalak kal ittéek. An díluuash chichútak Baxxiilaatúuash dii koosáhtuuk. ⁹Akbaatatdía kusseé “Ahóoh.” buuk. Díluk kal ii balee daásittak baa bihkammáatuuk. An dii ala kootúuash biikukkák “Tak ítchiwík.” baliatuuk. ¹⁰Baapí dak óotchia dak kukkala an bahchiwakáaush kan díawaakaasuuk. Bíiluh baawiísh dii awákaawiawuuk. An dii bahkuxsúuash an díluuosh balee baa kalátchem ii díaluuash ammaa alákaawachissuuash díawaawalakuulak baliatuuk.

¹¹Hilísh báakukkule Baksáau Akbaatatdía dak Baxxiilaatúua Jesus bilíash dústawilikkuulak díluss beéwohmaachik. ¹²Hilísh Jesus an bach aláchissuuash kalakoon aa áxpilhaalakak haak akukkóosh bilaxpáake al aláchissalakuuash kúh kooxaalawák bínmaxuoo an dii awáchissawalakuuash kootíih. ¹³Iwahkootdak kuhée kan dalásatchutak an dii ala pásshualitduuleetak Akbaatatdía kal ii daásitchiihmaachik shóon Baxxiilaatúua Jesus is bilaxpáakeesh ápak báakukkoko huulák.

4 An dii bilaxpáakuua ii Akbaatatdía daásitchihchewiaalah. ¹⁻²Aaleéla bakúpkaatuuan hinné kúh íkaalah. An dii bilaxpáakuua an díhchi dilúttuuash bíluuan dii awóowiok. Akbaatatdía kal an daasalítcheesh kan díaluuk an dii an bilaxpáakuua ii. Heem hilaakée íkuukaweh. “Kalakoon aa kan diakaasáalah. Kalakoon aa kalatchekaasáalah.” buuk. Baxxiilaatúua Jesus kal an dii balee chiweéhcheesh koók. Kalako balee ihchiláakuuhchek. ³Ikuukaweh hileén. Akbaatatdía an dii an bilaxpáakuuash kal an dii díahkuuash koók. Kalako kuss alákaak díhchikittaak an dii an bilaxpáakuuash baa ala sáapeesh kalako díalaalakak balee batchooléesh kootálak díalaassaataahilak íwahkootdak hiliachik. ⁴Kan díinnaxua élahkaak díaluulak kala koók. Daxúoosh dáhchikittaak baa al iháateesh al ápasshileetduulak

kala koók. ⁵Akbaatatdía ak alaaxtéesh an díoosh xawíik. Akbaatatdía baa an balee díahcheesh alaaxtúulasshen an dútchahaataattaak íwahkootuuk. ⁶Heem baa íwahkootesh akchiwakíilakupuuash an díakxawiiassalah. Kal íischiisaa dii baachiweetáahiluuk. Koótdaalolak Baxxiilaatúua Jesus kon baa íwahkootesh bakáleesh díaihmaachik. ⁷Akbaatatdía an balee íliash balee ítchikaatdak an balee bilaxpáakeesh ítchiwuulak hiliachik. ⁸Heem kala hileen ammaa dii baachiwaáush an dii baánmalaauash díalaawialaalichissuulak bilaxpáake ko iichúulessuuk. Ehkaalah Akbaatatdía ko iichúulaak. Baleiláaxbaaxpeesh dákak baa íwahkootesh ii dífhchi dáhkuksuulak hiliachik. ⁹Díiluss an baawalaáche koon balee akchiwakíiwakupuua an bach awáchissuuash diiluk ii dii baánmaliwiilush daatdeetak. Akbaatatdía iiaxúa ak dii baa óowioosh koók. Heem kan bach aláchishhiliilush daachim élahkuuk. ¹⁰Heem kúkkala díaluuk. Bale baa íchissheesh al ii díaluaa ítchikaashik. Dakúpuuash kusseé eehk Macedonia kootáa híik. Heem kalakoon aa kan díakaasak itchikaassaáhiiaaláh. ¹¹Hilfateesh kalako díisannaak díalaawialaakaasuulak kala koók. Baakoon ítche áalahkak kalakoon éhkoon baa ammaa dáhkassuut baa héele kooláak baa húupaatdaak huuash kuk baaleetak. Deéla baa bíalaalichissaa díilaa baa hilák bilaxpáakdaalah. Hinné kal íischiisaa an dii baachiwaák dii díawahkuuash koók. ¹²An dii an bilaxpáakuuash kal íwahkootdak kuhée kan awéelakolicheesh akchiwakíisseesh dii íkaak al ii baa shíioleetak. Heem kukkala baakoon kal íwahkootdaak kan baa bíalaalichissaak diilaxúako díinmialaak daalak dii áahkaachissuulak kala koók.

Baxxiilaatúuash ala chishshíiwia

¹³Bakúpkaatuuan baa ala kootaát dii baachiweéwíiluk. Heelak élahkuulak ítchik. Akchiwakíiam sheelák kalakoon shóotdak ko dii baachiweewiáwuuk. Heelak dalásuuash ii xawíissaaohmaachik. Hawátuum “Kal ii dúuhpee íkuuleetiimaachik.” hiliatak daásxawaak ihch aliilúuleeteesh diiluk dii kootássaah. ¹⁴Ischawúuan Dakkaasúua saák kaka chilém éwahkuuk. Heem bilaxpáakuum Jesus ko kaláttaak ko píisshe dáak kalakoon koolássuuash baapéem Akbaatatdía

kaka chiléhcheihmaachik. Kooták. Akbaatatdía chiléhkaak kalakoon awáxe koon Jesus híihcheesh kalako ii áxpak koolóhmaachik. ¹⁵Hinna baa dii baachiwaáu Baxxiilaatúuash iiaxuataáhile an balee baa chiwéesh koók. Ala huuwíash koottannák it hám balee bilaxpaakéelak hileen hawátuum kan bulusáaush iíschisee bíluchihk báakuss beéssaawohmaachik. ¹⁶Baaleettaá kala hilátiihmaachik. Baxxiilaatúuash iiaxuataáhile báakukkoko kalakoon awaxaáheetak huuák ilíia híisaá hiss déehcheihmaachik. Bilaxpáakiaxpawishbaakuss ahkeesh áapchalakukussahke aahiilák kalakoon Akbaatatdía is íkoooshe díkukkulohmaachik. Heelak bilaxpáakuum Jesus ko kaláttaak kalakoon súuash annúsaaush kala kootáahileen chilaaláwiohmaachik. ¹⁷Heelak koottannák it balee bilaxpaakéelak awáxpak kala kookaásheen kuluuannuúatak kalakoon báakussaawaak awáxe koon Jesus bííwohmaachik. Heelak awáxe koon iiwátxaawaak “Kahée.” baak kal awáxpak áawahkuua kal ii baa koochihtíihmaachik. ¹⁸Heem akian bale ilíiash ii bach ilíhchekaattaalah. Kal íwahkootak.

Baxxilaatúuash ala chishíiwia díhch áakhiiaalalah.

5 ¹⁻²Bakúpkaateen hinné kan díila élahchekaasuuash koók. Baxxiilaatúuash ala chishíiwia ko baapéesh bííwiawuuash ak éhcheleetak ak óonneetiihmaachik. Eehkoon ak baa ataaléem óotchia héelapeen huulák dáalaaxtiia ko kala kootíihmaachik. Akian ammaa dii baachiwaáhuuash shóottalakaasheen kootúulak balee alaaxták al íkuxxeesh baak ii balíwiawuulak kuk baaleetam élahcheliilush daatdeetak. ³Bilaxpáake éehkoo “baatách alíipdeetam baakoon” haak kaálolak kalakoon ammaa haawéesh kala húuhchelak “Eehkaawah.” haak baa baatcháatdiakaatcheohmaachik. Bía dáakbishbioo ammaa ilísuua basséesh al akúkaa húuleettaa huuáheesh ko kala kooták. Al iaxuáleetak ala kalúuleetak áaahkuohmaachik. ⁴Heetaa bakúpkaateen diiluk baa ala sáape ala chihpashé dii koolássuuk. Ko baapé huulák ak baa ataaléem baa ihkalaaxtéelush ko kala kootiihmaachik. Heetaa ko baapéesh diiluk kan díhch áakdaliiliilush daachik. ⁵Kooták. Kan díixaxua diiluk baapé al ítcheesh ala sáashiiash ko dii koolúuk. Ootchia ala chihpashéesh ammaa an

díalichkissuuash diiluk kal ii baa díalaassuuk. ⁶⁻⁷Ootchiat xapák iháwak kaáut kan baa dassihchíssuuk. Ootchiat an baafk díalichkissuua koók. Heem kal íwahkootam iak bilaxpáake hawa dassihchíssaa awáatak kaáush koochéessaalah. Díhchikittaak ala chishshíwiash íassiiak díhch áakdiiak káalah. ⁸Itchihk bíiluk an baapé ko balee koolák. Heem bihch íassaawaak bakaáwiilush daachik. Heelak kan bíiluk kan balee ishóochisseesh Akbaatatdía an balee kulutchéesh ko kuss awákaak amméaxeesh bale baa kalátcheesh bale baa íchissheesh iilíawaak baawiáawaak bakaáulak kala koók. ⁹Ikaak Akbaatatdía kan balee hiláhkaa óo kootáa ii baák baa bahchilakkaták ítche bíikaatbuulak hiliachik. Ak baa kxawíihile an bakánniash an daaskxawíiash bíiluk an balee ala híileetehtaa awímmiilak al ítcheesh ko bíolak hiliachik. Hinna Baxxiilaatúuash Ischawúuan Dakkaasúua bahkaláttuuash kal ii baa kooté koók. ¹⁰Saawilikkuuák kal ii awáxpak áawahkuua ii baa koochihtéesh díawilikkuuk. Heem shóon chishshíilak balee kulutchíihmaachik. Kan báasak bakaáu xuh it balee bilaxpaakéelak balee kulutták balee aaléihmaachik. ¹¹Heem kal íwahkook. Kal ii bat sapíhkaak ii bat píshko páachilelitdak ii bach kuxsáalah. An díaluuash kuk kala koók.

**Díiluss “Shóotaachi?” kaka baak bale
ilíim bapattawalákuuk.**

¹²Bakúpkaatuuan hinné díiluss baakaalaáhuuk. Eehk dii héeluan hawátuum koolúum ihchi baailísheek. Hinna bale chiwakíia ak dii baálilaash baa ala sáape iisalakussaalichéesh an díalaalichkisseesh kootálak ak dii óowiiak ak dii dakaaeeliták kuhtaa dii aalaáush kootéesh chikittaakuuáalah. ¹³Ii ihchi baailísheesh díaittaattaakuuáalah. Sáapashteehkaak íchissakuuk íwahkootaalah. Itche bach áxpak áaahkukaattaalah. ¹⁴Bakúpkaatuu hinné kúh díaalah. Eehk ak íishitdaatak baahinmíassaalicheesh baálilaalah. Eehk ak baailísheesh chiwaakuuáalah ammaa chiláauleetak. Eehk ak baa áakaawaatdeeteesh ítche kuxsakuuák íwahkootdaak bilaxpáake dáanniiitchilaak duulák kala koók. ¹⁵Hinné íasseekaashih. Eehk aaláa hám bat sheéss baawíshxawaak

“Bii díakxawiiialeesh bíh balápbishbiik.” heiluash koochéehchessaalah. Baakoon kukkala baapé xaxúia bach inníitchiik akukkóosh kúh kootáalah. Bat díalaaitchilaak baa íwahkooteesh kalako díiskualiaalah. ¹⁶ Akbaatatdía kusseé “Ahóoh.” haak baalíhkammaachkaalah. ¹⁷ Dáhchiwakaau koowéessaalah. ¹⁸ Baa ala sáapeesh xaxúia ii “Ahóoh.” haalah Akbaatatdía kusseé. Akbaatatdía kal an dii díahchewioosh hinné koók. An dii an bilaxpáakeesh kala Christ Jesus kon dii eém kal an daxáchiiash íwahkootak. ¹⁹ Baleiláaxbaaxpee awááss dúuxaashissaalah. ²⁰ Bilaxpáakeem Baleiláaxbaaxpee ii ilíiatdak ilikkákkaahelissaalah. ²¹ Itchiik baa ala shííosh xaxúia chilassihchikaásak kootúu xuh shóotdak ala kootéesh dúttak kalako ii xatáalah. ²² Baa al iháatshiishiaaheesh kooxiíssaalah.

²³ An bahchiwakáawalakuuash an dii ítchikaateesh ii dii díahkaak iiaxúia ala kootéesh díilun dii kootáshtehcheoh. “Dii baa hoowikáatak dii bilaxpáakitchikaate aa Baxxiilaatúua ala chisshíiash híiik.” baak baakaanmalákuuk. ²⁴ Kal íwahkoote Akbaatatdía kal ak dii aahiiwíash koóm díalakuihmaachik. Kuk ihch aashtáchissaak.

²⁵ Bíiluh chiwakáawilikkuuaalah bakúpkaatuu.

²⁶ Dakúptatchee óhchikaapbilikkuuaalah. ²⁷ Kan dii hilíacheewahchek. Hinna baa baalaáche eehk bakúpuua ishóotuan dáawiaalah. Baxxiilaatúua kal an balee díahcheesh koók.

²⁸ Hilísh Baxxiilaatúuash Jesus Christ an baa daásdeesh dákuik. Ahóoh.